

Movimentu Kontra Okupasaun Tasi Timor

Asaun hodi Selebra Loron Internasionál ba Direitus Umanus

(10 Dezembru 2013)

Deklarasaun ba Media

Ohin 10 Dezembru 2013, mundu tomak selebra loron internasionál ba direitu umanu ba dala 53. Hodi hanoin hikas fali tortura, violasaun, masakre no mós sofrimentu sira ne'ebé povu Timor-Leste simu ona iha tinan barak nia laran, mak ami, **Movimentu Kontra Okupasaun Tasi Timor**, ne'ebé halibur organizasaun massa estudante, juventude, rezisténsia, sociedade sivíl no mós organizasaun massa popular sira iha Timor-Leste, hodi mai selebra loron ida ne'e, iha Embaixada Australia nia oin, hodi hato'o:

A. Protesta no Kondena ba:

1. Governu Australia ne'ebé uluk apoiu invazaun Indonesia ba Timor-Leste, ne'ebé hamate emar Timor-Leste hamutuk besik rihun atus rua. Governu Australia nian tenke responsabiliza ba desizaun ne'ebé sala iha pasadu no husu deskulpa ba povu Timor-Leste;
2. Aktu Servisu Intelijénsia Australia ne'ebé halo espionajen ba Timor-Leste durante negosiasaun ba Tratadu CMATS (Certain Maritime Arrangements in the Timor Sea) Nudár aktu ne'ebé la respeita soberania RDTL nian, dezvaloriza prinsipiu ba direitus umanus, justisa no demokrasia.
3. Aktu hodi hadau tiha ona dokumentu no pasaporte husi sasin prinsipál ba Timor-Leste nian iha arbitrajén demostra violasaun ba direitu fundamental ema nian hanesan "freedom of conscious, freedom of expression, freedom for testimony, freedom of assembly", no mós, viola ona "free trial principle".
4. Aktu Governu Australia ne'ebé la hatudu vontade nudár viziñu ne'ebé dí'ak hodi fó solusaun ne'ebé justu no sustentavel hodi rezolve fronteira maritima entre RDTL no Australia. Ami ezije atu Australia prontu hodi rezolve fronteira ne'e tuir prinsipiu lei internasionál nian ka uza liña klaran atu hafahe soberania rai rua ne'e nian. Povu Timor-Leste no Australia iha direitu atu hetan justisa, no liña klaran nudár desizaun ida ne'ebé justu ba povu rai rua ne'e.

B. Ejjénsia

1. Governu Australia:

- a) Atu fó liberdade ba sasin prinsipál no respeita profesionalizmu advogadu Sr. Bernard Collaery.
- b) Atu bele respeita soberania Timor-Leste nian, no hakotu espionajen ne'e iha futuru;
- c) Atu iha vontade di'ak hodi ko'alia kona ba fronteira maritima bazeia ba prinsípiu liña median

2. Povu Australianu Povu Timor-Leste

- a) Ita hakbelun malu ona iha tempu sira ne'ebé susar, husi kedas iha Segunda Guerra Mundial ne'ebé Timor-oan liu 40,000 sakrifika sira nia moris, Jornalista Australia na'in 5 ne'ebé mate iha Balibo iha 1975, no tulun ne'ebé povu Timor-Leste hetan iha 1999. Ami enkoraja povu Australia no Povu Timor-Leste, atu tau matan ba Governante sira hodi halo kooperasaun entre rai rua ne'e ho boa fe no bazeia ba prinsípiu "noninterference, free trial, free witness" no prinsípiu tuir konvensaun internasionál hodi promove dame, kombate kiak, kombate hamlaha no respeitu dignidade umana;
- b) Ami husu ba povu Australia tenke tau matan no ezije kontabilidade ba utilizasaun taxa ba fundus kooperasaun nian husi ajénsia Governu Australia na'in, AusAID iha rai hotu, atu labele utiliza sala ba servisu espionajen nian.
- c) Ba povu Timor-Leste, ita tenke firmi nafatin hodi defende ita nia direitu ba territóriu rai no tasi ne'ebé loloos pertense ba Timor-Leste tuir prinsípiu no lei internasionál. Povu Australia ita nia belun, barak husi sira sakrifika sira nia tempu, sira nia futuru no sira nia moris ba ita nia direitu ida ne'e. Ita hakarak hametin relasaun ne'ebé jenuinu entre povu nasaun rua ne'e ho prinsípiu mutualismu no respeita ba ida-idak nia direitu.

Viva Povu Australia

Viva Povu Timor-Leste

Dili, 10 Dezembru 2013

Reprezentante Movimentu Kontra Okupasaun Tasi Timor
Juvinal Dias, +670 7734 8703, E-mail: zebdiaz@gmail.com